

LIGJ
Nr. 141/2020

**PËR DISA NDRYSHIME DHE SHTESA NË LIGJIN NR. 163/2014, “PËR
URDHRIN E PUNONJËSVE SOCIALË NË REPUBLIKËN E SHQIPËRISË”, TË
NDRYSHUAR**

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 163/2014 “Për Urdhrin e Punonjësve Socialë në Republikën e Shqipërisë”, të ndryshuar, bëhen këto ndryshime dhe shtesa:

Neni 1

Shkronja “b” e pikës 2 të nenit 8 ndryshohet si më poshtë:

“b) të zotërojnë diplomë të studimeve të larta “Bachelor” në fushën e punës sociale dhe diplomë të nivelit “Master i shkencave/Master profesional” në të njëjtën fushë, lëshuar nga institucionet e arsimit të lartë brenda ose jashtë vendit, si dhe të njohura e të njësura në Republikën e Shqipërisë nga ministria përgjegjëse për arsimin.”.

Neni 2

Neni 13 ndryshohet si më poshtë:

1. Këshilli Kombëtar i Urdhrit është organi ekzekutiv i Urdhrit, i cili përbëhet nga 15 anëtarë, ndër të cilët 10 janë të zgjedhur nga Asambleja, përfshirë kryetarin, dhe 5 të tjerët janë përkatësisht: një përfaqësues nga ministria përgjegjëse për çështjet sociale, një përfaqësues me rotacion nga ministrinë e përmendura në pikën 1 të nenit 9 të këtij ligji, dy përfaqësues nga institucionet e arsimit të lartë të shkencave të punës sociale, një përfaqësues nga shoqatat e punonjësve socialë, të caktuar nga Kryetari i Urdhrit, sipas kritereve të përcaktuara në statut.

1/1. Kandidatët për anëtarë në Këshillin Kombëtar, të zgjedhur nga Asambleja duhet të plotësojnë minimalisht këto kritere:

- a) të jenë shtetas shqiptarë me banim të përhershëm në Shqipëri;
 - b) të jenë anëtarë të Urdhrit;
 - c) të kenë jo më pak se 5 (pesë) vjet përvojë në ushtrimin e profesionit të punonjësit social;
 - ç) të mos kenë marrë masë disiplinore në 5 (pesë) vitet e fundit;
 - d) të mos jenë dënuar me vendim të formës së prerë për kryerjen e një veprë penale.
- 1/2. Anëtarët e Këshillit Kombëtar kanë të drejtë rizgjedhjeje vetëm një herë.”.

Neni 3

Në pikën 4 të nenit 14 bëhen shtesa dhe ndryshimi i mëposhtëm:

1. Në fillim të shkronjës “b” shtohet togfjalëshi “të jenë anëtarë të urdhrit dhe”.

2. Shkronja “c” ndryshohet si më poshtë:

“c) të kenë jo më pak se 5 (pesë) vjet përvojë në ushtrimin e profesionit të punonjësit social;”.

Neni 4

Neni 18 ndryshohet si më poshtë:

“Neni 18

1. Ministri përgjegjës për çështjet sociale, me urdhër, ngre një komision të përkohshëm për organizimin e zgjedhjeve të para të Urdhrit.
2. Kompetencat dhe veprimtaria e komisionit të përkohshëm përcaktohen me udhëzim të ministrit përgjegjës për çështjet sociale.
3. Me zgjedhjen e Këshillit Kombëtar të Urdhrit, komisioni i përkohshëm shkrihet automatikisht.”.

Neni 5

Neni 19 ndryshohet si më poshtë:

“Neni 19

Dispozita kalimtare

1. Individët, të cilët në momentin e hyrjes në fuqi të këtij ligji ushtrojnë ose kanë ushtruar profesionin e punonjësit social për një periudhë të caktuar kohe, por nuk kanë formimin dhe kualifikimin profesional minimal, sipas shkronjës “b”, të pikës 2, të nenit 8, të këtij ligji, e ruajnë vendin e punës për një afat të caktuar, por janë të detyruar të ndjekin programe të formimit dhe kualifikimit profesional, sipas këtij ligji, të përshtatshme për ushtrimin e profesionit të tyre. Pas përfundimit të programit të formimit dhe kualifikimit profesional, të përshtatshëm për ushtrimin e profesionit të tyre, ata i nënshtrohen provimit të shtetit.
2. Individët e përcaktuar në pikën 1 të këtij neni regjistrohen përkohësisht në një regjistër të posaçëm të Urdhrit deri në përmbushjen e kriterëve të nevojshme të anëtarësimit.
3. Profesionisti, i diplomuar pas hyrjes në fuqi të ligjit nr. 90/2014, “Për një shtesë në ligjin nr. 10171, datë 22.10.2009, ‘Për profesionet e rregulluara në Republikën e Shqipërisë’, të ndryshuar” dhe që ka kualifikimin minimal sipas shkronjës “b”, të pikës 2, të nenit 8, të këtij ligji, e ruan vendin e punës dhe regjistrohet përkohësisht pranë Urdhrit Profesional deri në dhënien e provimit të shtetit.
4. Procedurat, kriteret dhe afatet për ndjekjen e programeve të kualifikimit profesional, si dhe afatet brenda të cilave individët sipas pikës 1 të këtij neni mund të vazhdojnë të ushtrojnë profesionin e punonjësit social, së bashku me të drejtat, detyrimet dhe kushtëzimet e mundshme që këta individë mund të kenë në marrëdhënie me administratën publike dhe entet private, ashtu si dhe me vetë Urdhrin, si pasojë e mangësive të tyre në formimin dhe kualifikimin profesional, si dhe periudha e eksperiencës së punës, e nevojshme për të lindur e drejta për vazhdimin e ushtrimit të profesionit, sipas pikës 1 të këtij neni, dhe dokumentacioni i nevojshëm për vërtetimin e saj, përcaktohen me vendim të Këshillit të Ministrave.”.

Neni 6

Aktet nënligjore

1. Ngarkohet Këshilli i Ministrave, që brenda 3 muajve nga hyrja në fuqi e këtij ligji, të nxjerrë aktin nënligjor në zbatim të pikës 4, të nenit 19, të këtij ligji.
2. Ngarkohet Ministria e Shëndetësisë dhe Mbrojtjes Sociale, që brenda 3 muajve nga hyrja në fuqi e këtij ligji, të nxjerrë aktin nënligjor në zbatim të pikës 2, të nenit 18, të këtij ligji.

Neni 7
Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr. 11865, datë 11.12.2020, të Presidentit të Republikës së Shqipërisë,
Ilir Meta.**

Miratuar në datën 26.11.2020.